

'S ma gheibh e thu d' leisgean,
 Gun deasach fa' chomhail,
 Cha dean aithreachas criche,
 Do dhionadh o'n doruinn.

Gur mithich fas diadhuidh,
 'S do chiabha air glasadh,
 Na 'm bearnaibh do dheudach,
 Is d' eudan air casadh;
 Do bhathais air rusgadh,
 'S do shuilean air prabadh,
 Agus croit ort air lubadh;
 Chum na h-uire do leaba.

Tha na sruthana craobhach,
 Bha sgaoileadh a' d' bhallaibh,
 Gu mireagach buailteach,
 Clis gluasadach tana;
 A nise air traoghadh
 O n' taomachadh thairis,
 O ragaich is dh' fhuaraich
 Teas uabhair na fala.

Balg-seididh na beatha,
 Tha air caitheadh gun fheum ann,
 'S o chrup ann a' d' chiabh e,
 Gur h-e phian bhi ga sheideadh:
 Tha 'n corp d' chruit chiel ud,
 Air diultadh dhuib' gluasadh;
 'S comhthir' cinnt' air a thaignidh,
 Bhi lasach, a theudan.